

東華續錄

光緒一百六十九

臣朱壽朋敬編

臣張毓英恭校

八月甲午朔諭朕欽奉 慈禧端佑康頤昭豫莊誠壽恭欽獻崇熙皇太后懿旨聞李鴻章現在患病尙未痊愈該大學士以時局多艱力疾從公不肯請假具見忠愛性成朝廷嘉許之餘益深廑念著賞假三十日安心調理期早就痊以紓垂系○諭朕奉 慈禧端佑康頤昭豫莊誠壽恭欽獻崇熙皇太后懿旨有兵部左侍郎李昭煒等奏安徽大水請飭助賑一摺據稱安徽自五月起大雨連旬山洪暴漲同時泛溢圩堤衝塌甚多大江南北各府州縣田廬禾稼人口牲畜漂沒不知凡幾請迅速籌濟等語安徽此次被水災區較廣前據王之春奏陳當經諭令妥籌賑濟深宮軫念災黎實深憫惻著頒發內帑銀五萬兩交王之春核實散給並著察看全省分別輕重迅即多方賑撫毋任一夫失所○乙未諭人才為政事之本作育人才端在修明學術歷代以來學校之隆皆以躬行道藝為重故其時體用兼備人才眾多近日士子或空疏無用或浮薄不實如欲革除此弊自非敬教勸學無由感發興起除京師已設大學堂應行切實整頓外著各省所有書院於省城均改設大學堂各府及直隸州均改設中學堂各州縣均改設小學

堂並多設蒙養學堂其教法當以四書五經綱常大義為主以歷代史鑑及中外政治藝學爲輔務使心術純正文行交修博通時務講求實學庶幾植基立本成德達材用副朕圖治作人之至意著各該督撫學政切實通飭認真興辦所有禮延師長安定教規及學生畢業應如何選舉鼓勵一切詳細章程著政務處咨行各省悉心酌議會同禮部覆核具奏將此通諭知之○丁酉諭軍機大臣等世續等奏祀典重地防守喫緊請妥籌巡防一摺著全權大臣暨留京王大臣轉飭各該衙門添派弁兵加意防範勿稍疏虞○諭張之洞奏出洋華商表明心跡請准銷案免究並予褒獎一摺據稱福建舉人內閣中書銜邱煒葵向在南洋新嘉坡一帶經商素爲華商之望上年唐才常在漢口破案供有邱煒葵伙助該逆錢財之語經該督通緝查拿茲據該舉人稟稱初與康梁二逆往還嗣聞其藉端斂財煽黨謀逆立即痛恨絕交寃被株連懇予自新奏明銷案免究並報効賑捐銀一萬兩等語康梁二逆遁逃海外煽惑人心藉會斂財似此被其誑誘者必所不免既據該舉人輸誠悔悟具見天良殊堪嘉尚邱煒葵著加恩賞給主事並加四品銜准其銷案以爲去逆效順者勸○奕劻李鴻章電致 行在軍機處升任府尹河南藩司陳夔龍前經 臣等奏請留京數月奉 旨俟張仁黼到後再赴新任現查府尹已簡陳夔龍該藩司承修 蹕路經由之地關係緊要可否仍遵前 旨飭陳夔龍馳赴新任之處理合請 旨遵行祈代奏軍機大臣奉

旨陳夔龍著留辦蹕路工程俟報竣後再行請旨○以王丕雄爲山西大同鎮總兵○戊戌諭造就人才實係當今急務前據江南北四川等省選派學生出洋肄業著各省督撫一律仿照辦理務擇心術端正文理明通之士遣往學習將一切專門藝學認真肄業竭力講求學成領有憑照回華卽由該督撫學政按其所學分門考驗如果學有成效卽行出具切實考語咨送外務部覆加考驗據實奏請獎勵其遊學經費著各直省妥籌發給准其作正開銷如有自備旅資出洋遊學者著各該省督撫咨明該出使大臣隨時照料如果學成得有優等憑照回華准照派出學生一體考驗獎勵候旨分別賞給進士舉人各項出身以備任用而資鼓舞將此通諭知之○己亥奕劻李鴻章電致 行在軍機處頃接醇王柏林江電禮奉 命本爲德國專使自遞書後雖德皇款接優渥但因前節未免猶有介懷屢晤外部據稱除美日與彼無涉若往歐洲英意比有違專誠之旨該皇深不謂然收禮至今尙在游移未定禮今日前往丹溪閣大操五日可回柏林仍須看各廠院約計八月廿在德卽可竣事而意皇來信西十月十五後方能接待又接駐英羅使函稱英外部瀾侯云曾接駐京公使來電雖有敦請往游之意至今尙未奉有英廷敬迓之諭等語禮此番遠涉風濤到德後歷觀各廠精神勞頓飲食減少兼有水土不服之證務懇與駐京英意比公使設法託辭婉商萬勿宣示該外部阻行之意現擬德事畢後卽行前赴美日順道回國

以上各節均已函達羅使矣伏乞代奏請 旨示遵云 上諭軍機大臣等朕欽奉 懿旨載瀝江電覽悉此行本爲德國專使該親王現有水土不服之證飲食減少聞之深爲廬念在德使事既畢著卽啟程回華以慰遠系美日意比各國使事暫從緩議此時均毋庸前往○庚子戶部奏光緒二十七年七月二十九日奉 上諭朕欽奉 皇太后懿旨捐納職官本一時權宜之政近來捐輸益濫流弊滋多人品混淆仕途冗雜實爲吏治民生之害現在振興庶務亟應加意澄清嗣後無論何項事例均著不准報捐實官自降旨之日起卽行永遠停止統限一箇月內截數報部毋得奏請展限其虛銜封典翎枝貢監及現行常例准捐各項究竟有無妨礙著該部核議奏明辦理欽此欽遵由內閣鈔出到部臣等伏查報捐實官既經奉 旨永遠停止凡各項花樣因捐納實官班次而設者均應一律停止不准再行報捐至虛銜封典貢監翎枝等項各省遇有水旱偏災多藉此項捐輸以資賑濟且與實官有別自不在應行停止之列第成數過減殊不足以示鄭重應令嗣後各省賑捐凡銜封貢監均以五成實銀上兌各項翎枝仍准按賑捐章程上兌惟必須收足數目不准私自折減倘或承辦人員再有暗中折減之弊卽由各該督撫查明從嚴參辦又四川津貼捐輸亦僅係銜封等項自應照舊辦理又現行常例准捐各項從前停止捐輸之年此項常捐均未奏明停止原以常捐各項多係就已有實官人員量爲推廣與初捐實官並加

捐實官者均有不同尙屬無礙政體應請照常開辦統歸部庫按照籌餉定例銀數交納外省不准兌收
又報効股票銀兩業經臣部奏明按照例定十成銀數請獎實官等項此係先行報効銀兩續經奉旨
准給獎敘亦與現在報捐實官者不同仍請照案奏獎以昭大信惟查近年各省督撫往往因官紳報効
鉅款奏明請旨從優獎勵此項人員名爲報効實與捐輸無異且一經特旨允准較尋常捐納之員
班次更爲優異應令嗣後凡有報効鉅款奏請優獎之案須聲明報効銀兩較籌餉例定有增無減並將
款項全數解部聽候撥用無論何省概不准徑行截留以杜取巧而昭核實得旨如所議行○張之洞
奏竊維周禮開卷大義曰辨方正位體國經野是知古聖人經世大端必自觀天文察地理始臣前於光
緒二十七年二月十三日准前護陝西撫臣端方來電以內廷需用大清一統志秦垣徧查不得屬
臣訪購呈進等因仰見我皇上眷懷實字孜孜求治之至意臣謹考是書於乾隆八年輯成者計三百
五十六卷乾隆二十九年以後續行編輯者增爲五百卷本擬訪求殿本原書因鄂省徧訪未得並向
蘇杭湖南等省於書肆及藏書家廣爲搜求均無其書僅在揚州購到排印大字本四百五十六卷者一
部紙版尙屬完整其五百卷者各處藏書家無論殿本重刻本皆無其書祇有上海石印縮本字跡較
小檢閱頗費目力未敢率行進呈茲謹將三百五十六卷之大字本一部裝潢成帙上呈御覽竊思有

書不可無圖而輿圖以後出者爲勝近年廣東鄒伯奇所刊 皇朝輿地全圖係按照西法測準經緯度以弧綫分度其地面所當天度之部位較爲密合當飭鄂省兩湖書院各學生散謄摹繪兩分一成直幅八幀以便懸掛一裝冊葉三本以便披尋因天文度數與地球內外上下正相印合於考覽地圖甚有關涉並飭兩湖書院學生另繪赤道南北恆星圖直幅兩幀橫幅一幀藉可考見南北兩極赤黃兩道及隲次之所在又附進上海製造局所刊地球全圖兩幅足以覘環球之疆域上海銅版刊印之亞細亞東部輿地圖一幅足以驗近洲之形勢又因圖係平面欲測天地全形尙費體會推求因並附進製成天球地球各一具俾大圖運轉五洲列國可以一覽而知謹一併裝潢派委員弁齎赴 行在散謄呈進倘蒙萬幾之餘時加垂覽則環球大勢中華全局均可歷歷在目以之上佐 綏定撫馭之方略或亦可稍有裨益得 旨所進畫圖等件均留覽○癸卯諭江南銀元局創設多年行銷甚廣已著成效自應遵照辦理著劉坤一會商張之洞陶模等將江鄂粵三局鑄造章程通籌妥議具奏○奕劻李鴻章奏 臣等前將總結條款摘要電奏奉 旨公約業已定議卽行畫押欽此茲已於七月二十五日會同畫押查 臣等上年奉 命議和始而各使竟將開議照會駁回幾莫測其用意之所在嗣於十一月初一日始據送到和議總綱十二款不容改易一字 臣等雖經辦送說帖於各款應商之處詳細開說而各使置若罔聞且時

以派兵西行多方恫喝臣等相幾因應筆秃臂焦卒以時局艱難鮮能補救撫衷循省負疚良深所有一切辦理情形均隨時電陳摺奏及至商定總結條款各使猶必須候懲處各省教案牽涉人員奉旨始肯畫押今雖將京城內撤兵日期填註約內而各國在天津所設暫理地方之都統衙門仍復不肯遽撤各使有俟奉天牛莊交還時一體交還之說容少遲再行設法另案磋商以期早日收回免多窒礙臣等伏查近數十年內每有一次構衅必多一次喫虧上年事變之來尤爲倉卒創深痛鉅薄海驚心今和議已成大局少定仍望我朝廷堅持定見外修和好內圖富強或可漸有轉機譬諸多病之人善自醫調猶恐或傷元氣若再好勇鬪狠必有性命之憂矣悽悽之愚伏祈聖明垂察除將畫押約本咨送外務部收存俟回鑾後再行進呈御覽外所有照錄條款全文緣由理合恭摺馳陳報聞○任道鎔奏臣於本年六月二十六日到任以衢州教案攸關緊要日久尙未議結隨先查核原卷等經前撫臣惲祖翼及署撫臣余聯沅先後飭屬拿解案犯行司督府訊錄切供陸續開摺咨由會辦商務大臣盛宣懷咨全權大臣與在京公使議辦在案當時如何會訊浙省無案可稽臣當將官犯鮑祖齡先行派員解赴行在由部定地發配免生枝節一面電請全權大臣查明示覆七月初十日承准軍機大臣電開奉旨鮑祖齡著定爲斬監候罪名貸其一死減發極邊充軍永不釋回榮銓著革職發往極邊周之德著斬立決

劉樹堂著革職永不敘用飭令回籍交地方官管束鄭永福鄭錫羅道樑均著斥革等因欽此復准兵部咨稱鮑祖齡應發新疆榮銓應發四川轉電前來臣查官犯鮑祖齡計將行抵江蘇常州遵卽換具咨文發驛沿途探投委員令其徑解新疆配所投收一面將已革都司周之德先行正法聞已革藩司榮銓在金陵患病卽電知兩江總督臣劉坤一就近派員起解並飭司將戕官殺教各犯研訊確供分別擬辦並將案文武官紳罪名一併審明定擬詳覆核辦去後茲據署臬司許貞幹會同署藩司誠勳連日督審明確開錄供摺分別擬議會詳前來臣覆查此案該莠民等聚眾殺害英教士湯明心等男女十一人並因西安縣吳德瀾保護教堂謂其通匪因而遷怒乘亂戕殺並及官眷幕丁人等至三十四名之多實屬慘忍已極臣詳加查核悉心酌議其情罪約分三等查羅楠卽羅廷芳周德崇卽景姚程老五卽祥浩周少根蔣榮大徐樟狗卽小麻子汪忠魁卽小告化李長根卽呂長根陳麻子卽老三老范卽范來興鄭榮芝卽鄭榮繼鄭桂生崔元浩卽守灝邵金榮卽蔡家牙兒等十四名均係倡亂禍首或則戕官殺及教士人等或係在場隨同下手逞兇滋事情罪最重均屬法無可貸擬請將該犯等十四名恭請王命一併先行正法查羅楠先已在監病故應仍照例戮屍與各犯一併梟首首級解赴犯事地方懸竿示眾以昭炯戒其餘樊英程夢熊薛文貴程徽魯德彪湯少伯周堂徐鴻福徐鈺堂等九名或臨時攔阻發兵坐視

不救或在道署管帶團勇或充團董當戕官殺教之時均不能保護約束或充兵丁手藝各自在場附和或牽賣教堂牛隻或書吏詐欺本官銀錢情殊不法均請擬發極邊足四千里充軍永不釋回惟查徐攀英程夢熊薛文貴三名均屬官犯應請從重改發新疆充當苦差永不釋回至黃言七卽黃德興張德彪嚴高祥孔裕乾戚忠宜卽戚忠義鄭老五等六名或僅倚勢擄取教堂板片或事後向兇犯查問分洋爲數無多訊未隨同在場滋事擬發回西安縣監禁五年以示懲儆又許老三卽許全潮一名應仍監候待質其餘鄭鏐等十七名雖由英領事照會指拿先後獲案但歷訊多堂供無在場滋事實跡內夏狗卽葉夏化一名先係領事指名嚴拿後經主教函囑保釋自應將鄭鏐卽鄭連生等十六名一併發回該縣暫行管押俟訪查確實再行稟辦仍將現在辦理情形剴切出示曉諭俾衆咸知下部知之○戊申諭李鴻章等奏妥籌本章辦法一摺據稱向例各項本章均由內閣票批進呈其請補請署各項之件必俟進呈出科後始行遵旨辦理請嗣後凡遇缺分題本改題爲奏以免積壓其餘本章照舊票批進呈等語內外各衙門一切題本本屬繁瑣現在整頓庶政諸事刪汰浮文嗣後除題本仍照常進呈外所有補缺輪署本章及向來專係具題之件均著改題爲奏其餘各項本章卽行一律刪除以歸簡易將此通諭知之○己酉戶部奏據全權大臣先後來電並還欸表一紙計此次賠欸議定四萬五千萬兩前數年每年本利

銀一千八百八十二萬九千五百兩嗣後按年遞加每年二千餘萬兩及三千餘萬兩不等至三十九年爲止總共本利銀九萬八千二百二十三萬八千一百五十兩另有允緩半年付利息銀九百萬兩分三年帶交由西歷明年正月初一日卽華歷冬月二十二日起照數付足欸目之鉅曠古罕聞限期之迫轉瞬卽屆就中國目前財力而論實屬萬不能堪然和議既成賠欸已定無論如何窘急必需竭力支持臣部職司度支固屬責無可卸各省值此艱鉅尤當勉爲其難亦惟有於出欸力求裁減入欸再求加增庶幾湊集鉅欸屆期歸償於大局不至貽誤謹將擬裁擬增各欸逐一開列恭呈 御覽一虎神營驍騎營護軍營光緒二十五年共開支津貼銀一百四十餘萬兩此項津貼原因添練各營始行加增并非兵丁底餉現擬自本年一起卽將各該營加增津貼銀兩照數裁減一神機營經費及步軍營練兵口分抽練兵丁口分光緒二十五年共開支銀一百二十餘萬兩前項經費口分係屬挑練各營兵丁先後加增之欸亦非兵丁底餉現擬將該營加增經費口分銀兩酌量裁減其如何分別辦理之處應俟回京後由該管營王大臣妥議籌辦一滿漢官員八旗兵丁向有米折一項每年由部庫約支銀一百餘萬兩此項米折係按例折減支給計官員俸米折銀每員每季所得不過數兩兵丁甲米折銀每名每季所得不過一兩上下是分之自屬無多而合之便積有成數擬自本年一起將前項米折銀兩暫行停支一南洋經費及沿

海沿江防費并各省水陸勇營練營舊有綠營率多事涉虛糜難期實濟擬一律酌加裁汰一房間捐輸按糧捐輸廣東已電奏開辦如果妥定章程辦有端緒尙屬籌款大宗擬通飭各省一體酌量試辦一地丁收錢酌提盈餘剔除中飽山東已奏准辦理臣部亦鈔錄原奏行咨各省仿照現擬再行通飭各省切實遵辦一鹽斤加價前已奏明辦理有案然爲數尙少款項亦均已撥用擬令各省就現在鹽斤價值每斤再加增四文一各省土藥一項茶糖煙酒四項非民生日用所必需重徵之尙無甚妨礙擬令就現抽釐數再加三成統計部庫裁減之款可省三百餘萬兩各省裁減及加增之款約略估計亦當有一千數百萬兩惟各省情形不同未必皆能逐款遵辦即使遵照部章實力籌辦而款項湊齊尙需時日仍恐有誤還期擬先就賠款二千二百萬兩之數令各該省關將應解部庫西征洋款改爲加放俸餉一款抵京餉改爲加放俸餉一款京官津貼改爲加復俸餉一款自光緒二十四年起加增邊防經費一款向未有漕省分循案解部漕折一款以上約共銀三百餘萬兩全數提出均留作賠款外尙有一千八百餘萬兩卽攤派各省責令按期報解其數目如何分別應按省分大小財力多寡爲斷擬派江蘇省二百五十萬兩四川省二百二十萬兩廣東省二百萬兩浙江省一百四十萬兩江西省一百四十萬兩湖北省一百二十萬兩安徽省一百萬兩山東省九十萬兩河南省九十萬兩山西省九十萬兩福建省八十萬兩直

隸省八十萬兩湖南省七十萬兩陝西省六十萬兩新疆省四十萬兩甘肅省三十萬兩廣西省三十萬兩雲南省三十萬兩貴州省二十萬兩計共一千八百八十萬兩各省自此次奉文派定以後均應接臣部單開裁減加增各辦法妥速籌辦倘單開各條內有與該省未能相宜及窒礙難行之處各該督撫均有理財之責自可因時制宜量爲變通并准就地設法另行籌措惟必須在本省司關道局湊足分派之數如期匯解不得短少遲延致有貽誤倘期限已屆而短少尙多卽惟各該督撫是問再通商各海關稅銀擬取足值百抽五現已商辦有成將來開辦後核計關稅究能徵收若干應將增出數目專爲賠款應用各省此次分攤之數尙可酌量核減得 旨如所議行○壬子奕劻李鴻章電致 行在軍機處頃據英使薩道義照會按照議和條款第十一款內整頓通商行船各條約及更改進口稅則各事宜現由本國政府派委五印度二等寶星印度政務處副堂馬凱爲辦事大臣本館漢務參贊戈頒及督辦英商老公茂公司德貞爲協辦大臣該三員約於中歷本月二十九日由歐洲起程計十月初間可到中國會議此項事宜在滬地最便請將貴政府擬派與本國辦事大臣會商之員姓名先行示悉等語查英使所稱本係應辦之事至更改稅則從前屢議未定今英國既願商辦東方商務英爲最大英允則各國易從是加稅一好機會盛宣懷久在滬地熟悉商情上年奉 旨派充會辦商務大臣於一切商稅情形必更留

心考核該大臣前年曾與現任蘇撫聶緝槩及總稅務司赫德在京議辦加稅事宜此次擬請 旨派爲辦理商稅事務大臣以資熟手總稅務司不能出京查有上海造冊稅務司戴樂爾漢口稅務司賀璧理均熟悉稅務條理堪以派令隨同辦理與英薩使言及該使頗以爲然乞代奏請 旨 上諭軍機大臣等著派宗人府府丞盛宣懷爲辦理商稅事務大臣議辦通商行船各條約及改定進口稅則一切事宜並著就近會商劉坤一張之洞妥爲定議稅務司戴樂爾賀璧理均著隨同辦理○崑岡等奏續查殉難官員請將莊禮本常椿等從優賜卹允之○癸丑先是劉坤一張之洞奏 臣等欽奉光緒二十六年十二月初十日 上諭法令不更錮習不破欲求振作當議更張著軍機大臣大學士六部九卿出使各國大臣各省督撫各就現在情形參酌中西政要舉凡朝章國故吏治民生學校科舉軍政財政當因革當省當併或求諸已或取諸人如何而國勢始興如何而人才始出如何而度支始裕如何而武備始修各舉所知各抒所見通限兩箇月詳悉條議以聞等因欽此仰見我 皇上懲謏多難必欲掃積習以濟時艱感泣之餘且愧且奮 臣等嘗聞之周易乾道變化者行健自強之大用也又聞之孟子過然後改困然後作動心忍性增益所不能者生於憂患之樞機也上年京畿之變大局幾危其爲我中國之憂患者可謂鉅矣其動忍我 君臣士民之心者可謂深矣窮而不變何以爲國然則修中華之內政採列國之專

長 聖道執中洵爲至當惟是中國貧弱廢弛之弊或相沿百餘年或相沿二千餘年一旦欲大加興革
必須規畫周詳確有下手之處然後血氣生而宿病自去疣癰決而元氣可支竊謂中國不貧於財而貧
於人才不弱於兵而弱於志氣人才之貧由於見聞不廣學業不實志氣之弱由於苟安者無履危救亡
之遠謀自足者無發憤好學之果力保邦致治非人無由謹先就育才興學之大端參考古今會通文武
籌擬四條一曰設文武學堂二曰酌改文科三曰停罷武科四曰獎勵游學敬爲 聖主陳之一設文武
學堂取士之法自漢至隋爲一類自唐至明爲一類無論或用選舉或憑考試立法雖有短長而大意實
不相遠漢魏至隋選舉爲主而亦間用考試如董晁鄒杜之對策是也唐宋至明考試爲主而亦參用選
舉如溫造种放之徵召是也要之皆就已有之人才而甄拔之未嘗就未成之人才而教成之故家塾則
有課程官學但憑考校此皆與三代學校之制不合現行科舉章程本是沿襲前明舊制承平之世其人
才尙足以佐治安民今日國威患深才乏文敝若非改絃易轍何以拯此艱危然而中國見聞素狹講求
無素卽有考求時務者不過粗知大略於西國政治未能詳舉其章西國學術未能身習其事現雖舉行
經濟特科不過招賢自隗始之意只可爲開闢風氣之資而未必遽有因應不窮之具考周官司徒之職
小戴禮學記之文大率皆以德行道藝兼教并學學成而後用之此外見於經傳者鄉國之學皆兼六藝

大夫之職必備九能書禮干戈司成並教寄象韞譚王制分官海外圖經伯益所傳潤色專對論語所重又按三代之制庠序之稱曰士卒伍之稱亦曰士實爲文武合一文武並重之明徵若孔子兼通文武學於四裔尤聖人躬行垂教之彰彰者此後漢舉使才唐採回歷隋志經籍多收方言明初文科亦兼騎射欽惟我 朝康熙年間測天造礮皆用西人 內府地圖創用西法之經緯綫此圖所刻銅板卽用東洋銅板之陰陽文尼布楚界碑兼用三體文字乾隆年間西域同文志兼列清漢蒙古西番托忒回部之書至於 內廷功課八旗授官皆係文武兼習 祖宗舊制洵足爲萬代法程今泰西各國學校之法猶有三代遺意禮失求野或尙非誣其立學教士之要義有三一曰道藝兼通二曰文武兼通三曰內外兼通其教法之善有四一曰求講解不責記誦一曰有定程亦有餘暇一曰循序不躐等一曰教科之書官定頒發通國一律大小各學功有淺深意無歧異其考校進退章程皆用北宋國學積分升舍之法才能優絀切實有據既不虞試官偏私亦不致摸索偶誤故其人才日多國勢日盛德之勢最强而學校之制惟德最詳日本興最驟而學校之數在東方之國爲最多興學之功此其明證其學校教法大率少年者先入小學堂先教以淺近文理算法史事格致之屬小學堂又分初等高等兩種小學成後選入中學堂所學門類甚多名曰普通學如國教格致算學地理史事繪圖體操兵隊操本國行文法外國語言文字行

文法等事皆須全習惟外國文字只兼習一國無論大小學堂皆有講國教一門皆有學兵隊之操場日本之教科名曰倫理科所講皆人倫道德之事其大義皆本五經四書普通學畢業後發給憑照升入高等學堂習專門之學自此以後然後文武分途或文或武聽其便惟文武皆必先習普通至專門之學習文事者名高等學校英分經教法醫化工六科又另設專門農商礦學法與英略同德又另設專門工學日本高等學校亦分六門一法科二文科三工科四理科五農科六醫科每科所習學業各有子目其餘專門各有高等學校查日本門目與中國情形較近歐美無學不兼講西教日本無學不兼講倫理習武備者名士官學校略分地理戰史戰法軍械測繪工程經理軍醫八門兼習外國文字兵式體操兵隊操行軍操射的擊刺乘騎泅水等事射的即鎗礮打靶擊刺即短刀刺鎗互擊習文事者高等學校畢業後發給憑照略如中國舉人分類量能而授以官其願再學者升入大學校大學校畢業領照者略如中國進士習武備者普通畢業後先入營練習半年方入士官學校士官學校畢業後仍須入營練習三年方爲畢業第一年學爲兵第二年學爲弁第三年卽在其營內充弁其弁亦名下士官其分際略如中國把總外委額外此堂畢業後發給憑照其國家卽用爲各軍少尉自少尉以上皆名士官大尉中尉少尉略如都司守備千總自官少尉以後可在本營敘勞升轉若僅由充兵出身者官至特務曹長爲止曹長略